

JUVE STABIA – TARDE NUESTRE = 0 A 3... 'A MADONNE SE L'HA VISTE!

L'ha mann't Aldo "Diecipalazzine"
martedì 26 aprile 2011

E Syyyyyyyyyy! Accome ha rumaste brutte quedda malacere de BRAGLIA. Ehehehe! Ce fejure de nijnde ha fatte! “lo non parlo con i Tarantini” ha ditte. Sciacquate ‘a vocche apprime! Carnevale! Le tarandine t’honne fatte vedè de ce paste so fatte! Mica sime pasta minute accome a tteje! Nuje sime: Maccarrune gruesse! Ehehehe! Ce dsoddisfazione uagnù! Oneste! Prime d’a partite haghie penzate ca avemma pigghià ‘nu mazziatone ferme-ferme.

Ma po’ indr’o cambe haghie viste unnece liune. Accome quidde d’u cirche ca honne mise nnanze o lacovone! Ehehehe! Ce bella Pasche st’anne! Ha segnate CORONA… ca jè angore ‘u nuestre e po’ GIRARDI e SY, ca honne abbevesciute, viste ca jè Pasche! E accussì mò stame indr’a zona play-loffe e manghene tre partite. Speriamme ca ‘a Madonne, ca se l’ha viste, n’accumbagne sempre. No’nge credeve ca ste vengemme tre a zere! Comungue, ‘u Mister ca se l’veve pigghiate piccè l’avemme ditte ca ‘u Tarde nuestre sciucave, sciucave ma ‘a palla ‘mborte no’nge a metteve, s’ha luatè ‘a spine. E sta bbene a DIONIGI! Pure pe l’avugurije ca n’ha fatte de ‘na Sanda Pasche. Accussì amme truate ‘na bella sorprese indr’alle ove de Pasche. Tre gol alle scabbiese! Beh Uagnù! Ve stoche a llasse mo’! Ca haghie a scè ffa carsuniedde. Faciteme pigghià ‘a scarcelle cu l’ove. Ce scarcella grosse m’honne preparate st’anne! Chiu grosse de quedde ca amme fatte nuje a BRAGLIA! Ehehehehe! Avugurije!